

ՄԻՋԴԱԴԱՆԱԿԱՆ ՀԱՄԱԳՈՐԾԱԿՑՈՒԹԻՒՆԸ ՔԵՍԱՊՈՒՄ ՀԱՅՈՑ ՑԵՂԱՍՊԱՆՈՒԹԵԱՆ ՏԱՐԻՆԵՐԻՆ՝

ՎԱՀՐԱՄ ՀՈՎԵԱՆ

vhovyan@yandex.ru

Քեսապը ժամանակակից Սիրիայի հիախս-արեւմուտքում, Միջերկրականի ափին գտնուող, Թուրքիային սահմանակից հայկական բնակավայր է։ Այն գաւառակ է, բաղկացած Քեսապ ամանից (գիւղաքաղաք) եւ յարակից տաս գիւղերից։ Քեսապը համարում է պատմականօրէն հայաբնակ երկրամաս, քանի որ հայերը Անտիոքում եւ նրա շրջակայքում հաստատուել են դեռեւա Տիգրան Մեծի (Ք.ա. 95-55) ժամանակներից²։ Դարերի ընթացքում Քեսապը այնքան է յագեցել հայկական շնչով ու մշակութային երանգներով, այնքան է հարազատացել հայութեանը, որ այն անգամ դիտւում է որպէս հայոց պատմական հայրենիքի մի մասը։

Քեսապը միշտ էլ եղել է Սփիւռքի, մասնատրապէս՝ Մերձատր Արեւելքի ամենակենսունակ եւ առանցքային հայկական համայնքներից մէկը եւ տուել է բազմաթիւ նշանատր գործիչներ ինչպէս Սփիւռքին, այնպէս էլ Հայաստանին։ Մասնատրապէս, յիշատակման արժանի է ծնունդով քեսապցի սկզբում Մեծի Տանն Կիլիկիոյ կաթողիկոս (1983-94), իսկ այնուհետեւ ամենայն հայոց կաթողիկոս (1995-99) Գարեգին Առաջինը³։

Հայոց Ցեղասպանութեան նախօրէին Քեսապում առկայ էին հայութեան բոլոր դաւանական շերտերը։ Գերակշիռ մեծամասնութիւնը կազմում էին հայ առաքելականները։ Նրանց կողքին կային նաեւ հայ կաթողիկէ եւ անտարանական համայնքներ։ Որպէս առանձին դաւանական շերտ կարելի է դիտել նաեւ լատինաձէս հայ կաթողիկէներին, որոնց անուանում են «հայկական ծագումով լատիններ»։

¹ Յօդուածը պատրաստուել է Հայոց Ցեղասպանութեան 100ամեակի առթիւ Սուրբ Էջմիածնի Գէորգյան հոգեւոր ճեմարանում 2015 Ապրիլի 7ին անցկացուած «Մերձատր Արեւելքի հայ հոգեւորականութեան առաքելութիւնը Հայոց Ցեղասպանութեան տարիներին» խորագրով միջազգային գիտաժողովում հեղինակի ներկայացրած զեկոյցի հիման վրայ։

² «Սիրիա», *Հայ սփիւռք հանրագիտարան*, Երեւան, «Տիգրան Մեծ» հրատ., 2003, էջ 508։ Անտիոքում եւ յարակից վայրերում հայերի վաղ ներկայութեան մասին մանրամասն տե՛ս՝ Յակոբ Զոլաքեան, *Անտիոքի մերձակայ Ռումի հովիտի հայերը (պալմա-ազգագրական ուսումնասիրութիւն)*, տպ. կաթողիկոսութեան հայոց մեծի տանն Կիլիկիոյ, Անթիլիաս, 2006, էջ 27-31։

³ Մանրամասն տե՛ս՝ Գարեգին Ա Սարգիսեան, *Քրիստոնեայ Հայաստան հանրագիտարան*, «Տիգրան Մեծ» հրատ., Երեւան, 2002, էջ 199-200։

Ընդհանրապես որպես Հայոց Յեղասպանության իրականացման ժամանակաշրջան ընդունում է համարել 1894-96՝ համիտեան ջարդերից մինչև 1923ը ընկած ժամանակաշրջանը: Ինչ վերաբերում է Քեսապին, ապա, սոյն աշխատության մէջ մենք անդրադառնում ենք ցեղասպանական երկու դրուագի.-

1. *1909ի ջարդերին:* Թէեւ 1909ի ջարդերն ընդունում է անուանել Ատանայի կոտորած, իրականում դրանց աշխարհագրական սահմանները շատ անլի լայն եւ ընդգրկուն էին, քան միայն Ատանայի վիլայէթը: Դրանք իրականում ընդգրկում էին ամբողջ Կիլիկիան եւ Անտիոքը⁴, եւ Քեսապն էլ նոյնպէս գերծ չմնաց 1909ի արհաւիրքից:

2. *1915ի տեղահանութեանը եւ դրան յաջորդած տարիների իրադարձութիւններին:* 1915ին Օսմանեան կայսրութեան բոլոր հայաբնակ շրջանների նման Քեսապը ենթարկուեց Յեղասպանութեան արհաւիրքներին՝ ջարդերին, անբաժանելիներին եւ տեղահանութիւններին:

Պատահական չէ, որ 2014 Մարտ ամսին Քեսապի դէմ իրականացում յարձակումը⁵ - որի հետեւանքով ամբողջ քեսապահայութիւնը տեղահանուեց եւ մօտ երեք ամիս ապրեց գաղթականի կարգավիճակում - քեսապցիների կողմից ընկալուեց որպէս Քեսապի երրորդ ցեղասպանութիւն՝ նկատի ունենալով մինչ այդ՝ Ի. դարի սկզբին (1909 եւ 1915), տեղի ունեցած երկու ցեղասպանական արհաւիրքները:

Հայութեան դաւանանքային հատուածների միջեւ համագործակցութիւնը անկախ նրանց միջեւ յարաբերութիւնների մակարդակից եւ որակից միշտ էլ եղել է: Այն ընդգրկել է հասարակական կեանքի բազմաթիւ բնագաւառներ՝ քաղաքական, մշակութային, կրթական, ընկերային են.: Ընդհանուր առմամբ եւ մասնատրապէս՝ Հայոց Յեղասպանութեան տարիներին, այդպիսի համագործակցութեան հիմքում ընկած են հետեւեալ հանգամանքները.-

• *Ընդհանուր ազգային պատկանելութիւնը:* Անկախ դաւանանքային տարբերութիւններից, հայ կաթողիկէները եւ հայ աւետարանականները միշտ էլ իրենց համարել են հայութեան անբաժանելի մասը: Նրանց մօտ ազգային պատկանելութիւնը միշտ էլ գերակայող է եղել դաւանանքային պատկանելութեան նկատմամբ: Ինչպէս նշում է գրող Րաֆֆին. «... Դաւանութիւնների բազմադասակցութիւնը չէ ոչնչացնում ազգային միութիւնը, միութիւնը պէտք է որոնել այդ մասների ներդաշնակութեան մէջ, որի հիմնական **մոթիլը** (ընդգծումը՝ ըստ բնագրի - Վ.Հ.) պէտք է լինի **ազգայնու-**

⁴ «Աղանայի կոտորած 1909», Հայկական սովետական հանրագիտարան, հ. 1, Յ. Մեղապարտի անուան պոլիգրաֆկոմբինատ, Երեւան, 1974, էջ 68:

⁵ Յակոբ Չոլաքեան, *Քեսապի երեք օրերը (21-23 Մարտ 2014)*, «Էդիթ Պրինտ» հրատ., Երեւան, 2014. Նաեւ՝ Վ. Հովեան, «Քեսապի իրադարձութիւնները. հայեացք Երեւանից», *Գլորուս*, 4:2014, էջ 52-62:

թիւն (ընդգծումը՝ ըստ բնագրի - Վ.Հ.) իր բարձր նշանակութեամբ»⁶: Բաֆֆու սոյն խօսքերը կարծես նշանաբան լինեն հայութեան կաթողիկէ եւ աւետարանական հատուածների համար: Ազգային ընդհանուր պատկանելութեանը գումարում է նաեւ կրօնական՝ քրիստոնէական ընդհանուր պատկանելութեան գիտակցութիւնը: Անկախ դաւանանքային տարբերութիւններից հայ առաքելականները, կաթողիկէները եւ աւետարանականները գիտակցում են ընդհանուր հաւատին՝ քրիստոնէութեանն իրենց պատկանելութիւնը, եւ դա թերեւս գերակշռութիւն ունի դաւանանքային տարբերութիւնների նկատմամբ: Ինչպէս մի աղիթով նշել է Դամասկոսի հայ աւետարանական եկեղեցու հոգեւոր հովիւ, պատուելի Տաթեւ Պասմաճեանը «Կարեւորը հայ քրիստոնեայ լինելն է: ...Վերջում, երբ Աստուծոյ մօտ գնանք, չի հարցնելու՝ աւետարանական ես, թե՞ առաքելական»⁷: Չխորանալով աստուածաբանական եւ եկեղեցաբանական խնդիրների մէջ, այնուամենայնիւ, այստեղ անելորդ չէր լինի մէջբերել նաեւ Պօղոս առաքելին. «... կան պաշտամունքի զանազանութիւններ, բայց Տէրը նոյնն է»⁸:

- **Խնդիրների ընդհանրութիւնը:** Անկախ դաւանանքային տարբերութիւններից հայութեան յարանուանական հատուածների առջեւ ծառացած են եղել միեւնոյն խնդիրներն ու մարտահրաւերները: Ուստի, ընդհանուր խնդիրները միասնական ջանքերով անելի արդիւնաւետ լուծելու անհրաժեշտութիւնն էլ դարձել է կենսատու հիմք՝ հայ առաքելականների, կաթողիկէների եւ աւետարանականների միջեւ համագործակցութեան: Այս հանգամանքը առաւել եւս վերաբերում է Յեղասպանութեան ժամանակահատուածին, երբ դրոպած էր ամբողջ ազգի (նրա բոլոր դաւանանքային շերտերով հանդերձ) գոյութեան հարցը: Կարո՞ղ է լինել ընդհանուր խնդիրների առկայութեան անելի մեծ ապացոյց, քան այն, որ Յեղասպանութեան տարիներին հայ առաքելականների հետ միասին հաւասարապէս կոտորածների ու տեղահանութեան են ենթարկուել նաեւ հայ կաթողիկէներն ու աւետարանականները, հայ առաքելական եկեղեցիների եւ այլ շինութիւնների հետ միասին աներուել ու հրկիզուել են նաեւ հայ կաթողիկէ եւ աւետարանական եկեղեցիները եւ այլ շինութիւնները (դպրոցներ, հիւանդանոցներ, որբանոցներ են.): Ինչպէս նշում է Չոլաքեանը, 1909ին Քեսապի դէմ իրականացուած յարձակման ժամանակ «խուժանը կը հրկի-

⁶ Բաֆֆի, «Ի՞նչ կապ կայ մեր եւ Տաճկաստանի հայերի մէջ», *Երկերի ժողովածու*, հ. 11, «Նայիրի», Երեւան, 1991, էջ 292:

⁷ «Հարցազրոյց Հայ Աւետարանական Եկեղեցու Դամասկոսի հովիւ, պատուելի Տաթեւ Պասմաճեանի հետ», Արաքս Փաշայեան, *Դամասկոսի հայ համայնքը. ներկան եւ հեռանկարը*, «Նորասան» ԳԿՀ տեղեկագիր, 23:2008, էջ 33-34:

⁸ «Պօղոս առաքելի առաջին թողթը կոռնթացիներին», Գլովի ԺԲ, *Նոր Կտակարան, Առաքելական թղթեր*, Մայր աթոռ Ս. Էջմիածնի տպարան, Էջմիածին, 1975, էջ 469:

զէ դպրոցները, լապինաց վանքը, կաթողիկէ եւ ամետարանական եկեղեցիները: Վերջինը գրեթէ հիմնովին կը քանդեն⁹: Իդէպ, ոճրագործի (թուրքի) կողմից կոտորածների ու տեղահանութեան ժամանակ հայ առաքելականների, կաթողիկէների եւ ամետարանականների միջեւ խտրականութիւն չդնելը լրացուցիչ վկայութիւն է վերջիններիս՝ միեւնոյն ազգին (հայութեանը) եւ կրօնին (քրիստոնէութեանը) պատկանելու մասին: Դա վկայում է որ ցեղասպանողների կողմից նոյնպէս հայ կաթողիկէները եւ ամետարանականները ընկալուել են որպէս հայութեան անբաժանելի մաս:

Հարկ է նշել, որ Յեղասպանութեան ժամանակահատուածն ունէր իր իւրայատկութիւնը, եւ վերջինս ենթադրում էր միջդաւանական համագործակցութեան համապատասխան ձեւեր եւ ուղիներ: Յեղասպանութեան տարիներին հայկական ինչպէս հոգեւոր, այնպէս էլ աշխարհիկ կառոյցների առջեւ դրուած էին հետեւեալ երեք հիմնական խնդիրները.

1. Արհաւիրքի կանխում.
2. Պայքար՝ արհաւիրքի հետեւանքները նուազագոյնի հասցնելու.
3. Արհաւիրքից յետոյ վերականգնողական աշխատանքներ (վերադարձ տարագրութիւնից, սկզբնական շրջանում կենսական խնդիրների լուծում են.):

Այս երեք հիմնական խնդիրներն էին դրուած Քեսապի հայ առաքելական, կաթողիկէ եւ ամետարանական հոգեւորականութեան առջեւ ինչպէս 1909ի, այնպէս էլ 1915ի ջարդերի ու տեղահանութեան ժամանակ: Դրանց արդիւնաւէտ լուծման նպատակն էլ ընկած էր յիշեալ ժամանակներում Քեսապում Հայ Առաքելական, Կաթողիկէ եւ Ամետարանական եկեղեցիների միջդաւանական համագործակցութեան հիմքում:

Արհաւիրքի կանխում

Արհաւիրքի կանխման գործում առաւելագոյնը, որ կարող էին անել քեսապահայ հոգեւոր եւ աշխարհիկ իշխանութիւնները, բանակցութիւններն էին տեղի թուրքական իշխանութիւնների եւ օտարերկրեայ դիւանագիտական ներկայացուցիչների հետ՝ հայկական բնակավայրերի նկատմամբ յարձակումները կանխելու, իսկ յարձակման դէպքում դրանք պաշտպանելու նպատակով:

Յատկապէս 1909ի կոտորածի ժամանակ արհաւիրքի կանխման հարցում հիմնական շեշտը դրում է թուրք տեղական իշխանութիւնների հետ բանակցութիւնների վրայ՝ երկու հիմնական պատճառով՝

ա. Ուժերի խիստ անհաւասարութեան պատճառով հայերը չէին կարող լուրջ դիմադրութիւն ցոյց տալ թշնամուն: Ինչպէս ցոյց տուեցին յետագայ իրադարձութիւնները, Քեսապի դէմ յարձակման ժամանակ թշնամու մօտ 30.000անոց ուժերի դէմ (կանոնաւոր բանակը՝ մօտ 5000, եւ ոչ-կանո-

⁹ Յակոբ Չոլաքեան, *Քեսապ*, Ա. հատոր, «Արեւելք», Հալէպ, 1995, էջ 92:

նատր զինուած խմբատրումները միասին վերցրած) քեսապցիները ստիպուած էին ինքնապաշտպանութեան դիմել մօտ 300 կոտուղներով:

բ. 1908ի երիտթուրքական յեղափոխութիւնից ոգետրութեան ալիքը յա-րաշարժութեան ուժով դեռ պահպանում էր: Հայերը հաատում էին, որ ե-րիտթուրք իշխանութիւնները, հաատարիմ մնալով յեղափոխութեան կար-գախօսներին, կ'երաշխատրեն իրենց անվտանգութիւնը: Այդ պատճառով էլ արհաւիրքի նախօրէին հայերի զգօնութիւնը թուպցել էր, ինչի դրսե-տրում էր այն, որ քեսապցիները նախապէս չէին ձեռնարկել ինքնապաշտ-պանութեան միջոցառումներ՝ զէնքի հայթայթում, պաշտպանական ամ-րութիւնների կառուցում եւն.: Հետեաբար, Քեսապի դէմ իրականացուած յարձակման ժամանակ քեսապցիները ոչ միայն քանակապէս էին զիջում թշնամուն, այլ նաեւ սպառազինութիւնների եւ այլ տեսակէտերից:

Քանի որ արհաւիրքի կանխման միակ հնարատր տարբերակը տեղի թուրք իշխանութիւնների հետ բանակցութիւններն էին, ապա միջդաւանա-կան համագործակցութիւնն էլ պէտք է դրսետրուէր այս ասպարէզում: Այդ համագործակցութեան դրսետրման հիմնական ձեւը միասնական պատ-ուիրակութիւնների ձեատրումն էր՝ բանակցութիւնների նպատակով: 1909ի ջարդերի նախօրէին, անհանգստացած շրջակայ հայկական բնա-կավայրերում տեղի ունեցած իրադարձութիւններով եւ Քեսապի վրայ մօ-տալուտ յարձակման մասին լուրերով, տեղի հայոց հոգետր եւ աշխարհիկ առաջնորդները ձեատրում են պատուիրակութիւն Օրդուի կառավարչի հետ հանդիպելու, մօտալուտ յարձակումների մասին լուրերի վերաբերեալ նրանից բացատրութիւններ լսելու, ինչպէս նաեւ յարձակման դէպքում Քե-սապը պաշտպանելու նպատակով պետական զինուած ուժեր խնդրելու համար: Պատուիրակութեան մէջ Քեսապի հոգետր առաջնորդներից ընդ-գրկուած էին Պօղոս քահանայ Աթիկեանը, լատինաց վանքի վանահայր հայր Սափաթինօն եւ միքանի ներկայացուցիչ էլ աւետարանական հա-մայնքից¹⁰: Թէեւ, ինչպէս ցոյց տուեցին յետագայ իրադարձութիւնները, տեղի թուրք իշխանութիւնների հետ բանակցութիւնները չանգեցրին էա-կան արդիւնքի, այնուամենայնիւ, նման ներկայացուցչական կազմով պատուիրակութեան ձեատրումը արդէն իսկ վկայում է վտանգի պահին թէկուզ բնազդաբար հայոց դաւանանքային շերտերի համախմբման եւ համագործակցութեան մասին:

Իսկ 1915 Յուլիսի 27ին, Քեսապից հայ բնակչութեան գաղթը կանխելու համար, կրկին պատուիրակութիւն է ձեատրում, թէեւ աւելի պակաս ներ-կայացուցչական կազմով, Հալէպ մեկնելու եւ, ի թիւս այլոց, տեղի գերմա-նական հիւպատոսի հետ բանակցելու նպատակով: Պատուիրակութեանը

¹⁰ Սոյն աշխատանքում ներկայացուած այս եւ միւս փաստերը վերցուած են սիրիա-հայ հայագէտ Յակոբ Չօլաքեանի՝ նախորդ տողատակում վկայակոչուած *Քե-սապ* հիմնարար աշխատութեան էջ 89-122 հատուածից:

անդամակցում են Քեսապի Ս. Աստուածածին եկեղեցու քահանայ տեր Պողոս Աթիկեանը եւ ամետարանական համայնքի հովիւ վերապատուելի Տիգրան Գունտաքճեանը:

Համագործակցութեան մէկ այլ ձեւ էր Քեսապի ճակատագրի, ընդհանուր անելիքների վերաբերեալ քննարկումներին համատեղ մասնակցութիւնը: Այսպէս, 1915 Յուլիսի վերջին, երբ յայտնի է դառնում քեսապահայութեան տեղահանման օսմանեան կառավարութեան որոշումը, շրջանի հայ երեւելիները Սերգօ աղայի տանը անցկացնում են գիշերային հանդիպում-քննարկում՝ որոշելու քեսապահայութեան ճակատագրի հետ կապուած կենսական նշանակութեան հարցեր (օրինակ՝ դիմադրութեան կազմակերպման նպատակայարմարութեան հարցը): Այդ հանդիպում-քննարկմանը մասնակցում են Աթիկեան քահանան, բժիշկ Աւետիս Ինճեճիկեանը (ամետարանական) եւ ուրիշներ:

Մի խօսքով, Յեղասպանութեան ժամանակ արհաւիրքի կանխման ասպարէզում հայկական յարանուանութիւնների միջեւ համագործակցութիւնը դրսեւորուել է քեսապահայութեան՝ լայն ներկայացուցչութիւն ունեցող կարճատեւ կառոյցների (օրինակ՝ պատուիրակութիւնների) աշխատանքներին անհատական եւ հաստատութենական մակարդակով համատեղ մասնակցութեան ձեւով: Աղէտի կանխման ասպարէզում, կարելի է ասել, որ գործադրուած ջանքերը մեծ հաշուով ցանկալի արդիւնք չեն տուել. հնարատր չի եղել առաջքն առնել քեսապահայութեան գլխին կախուած արհաւիրքին: Սակայն մեր խնդիրն է այստեղ ոչ թէ գնահատել գործադրուած ջանքերի արդիւնաւետութիւնը, այլ ցոյց տալ աղէտի ժամանակ հայութեան տարբեր շերտերի համախմբման եւ միասնական գործողութիւնների փաստը:

Պայքար արհաւիրքի ժամանակ վնասը նուազագոյնի հասցնելու համար

Այս ասպարէզում, միջդաւանական համագործակցութիւնը դրսեւորում էր գաղթի ճանապարհին կամ ժամանակաւոր ապաստանութեան վայրերում աղէտեալների վիճակը թեթեւացնելու նպատակով համատեղ ջանքերի գործադրմամբ: Այսպէս, 1915ի տեղահանութեան ժամանակ քեսապահայութեան գաղթակայաններից մէկում՝ Համայում, յոգնածութիւնից, քաղցից, ծարաւից, հիւանդութիւններից ուժասպառ եղած գաղթականների դրութիւնը բարելաւելու նպատակով հայ առաքելական հոգեւորական տեր Ներսէս Թաւութճեանը եւ ամետարանական վերապատուելի Գունտաքճեանը հանգանակութիւններ են կազմակերպում:

Իդէպ, հարկ է նշել, որ հենց հոգեւորականներն էին գլխատրում գաղթականների կարաւանները եւ անգամ գաղթի ժամանակ իրականացնում հայութեանն առաջնորդելու իրենց առաքելութիւնը: Ընդ որում, միջդաւանական տարբերութիւնների ջնջման եւս մէկ փաստ է այն, որ գաղթի ժա-

մանակ հայ առաքելական, կաթողիկէ եւ աւետարանական հոգեւորականներից իւրաքանչիւրը չէր ղեկավարում միայն իր համայնքը: Նրանք ղեկավարում էին ամբողջ գաղթականների կարաւանները, որոնց մէջ էին ե՛լ հայ առաքելականները, ե՛լ կաթողիկէները, ե՛լ աւետարանականները: Ընդհանուր քեսապահայութեան հետ միասին կրելով գաղթի ողջ զրկանքներն ու դժուարութիւնները՝ հայ հոգեւորականներից շատերը նոյնպէս դառնում են Յեղասպանութեան զոհ: Այսպէս, Համայի գաղթակայանում վախճանում են Քեսապի Ս. Աստուածածին եկեղեցու քահանայ Աթիկեանը, իսկ Նոյեմբերի 27ին ծանր հիւանդութիւնից յետոյ՝ նաեւ վերապատուելի Գունտաքճեանը: Ահա թէ ինչ է գրում տէր Ներսէս քահանան իր օրագրում վերապատուելի Գունտաքճեանի մահուան կապակցութեամբ, որը բնութագրում է ե՛լ վերապատուելի անձը, ե՛լ այդ շրջանում ծաւալուած համագործակցութիւնը առաքելական եւ աւետարանական հոգեւորականների միջեւ. *«Գործունեայ, մարմնով առողջ, անկեալներուն ծառայել սիրող, գործ եփել դարձնել գիտցող, բողոքական հասարակութեան մէջ համակրութիւն ունեցող մէկն էր: Համայի մէջ վերջին քանի մը ամիսներուն գաղթականներուն մեծ ծառայութիւններ մատուցելու եւ մեր հոն գտնուած ապրեանք միշտ կը գործակցէր մեզի հետ ու միշտ գոհ կը մնայինք իր գործունէութենէն»*¹¹:

Միջդաւանական համագործակցութեան դրսեւորում էր նաեւ այն, որ յարանուանութիւններից իւրաքանչիւրը իր ջանքերը եւ հնարատրութիւնները գործադրում էր ոչ միայն սեփական անդամների, այլեւ - անկախ եկեղեցական պատկանելութիւնից - բոլոր աղէտեալների կարիքները գոհացնելու կամ նրանց փրկելու համար: Այլ կերպ ասած՝ հայկական եկեղեցիներից իւրաքանչիւրը իր գործունէութիւնը ծաւալում էր ոչ միայն իր նեղ համայնքի, այլ ամբողջ հայ բնակչութեան շրջանում կամ փոքրածիր մակարդակով ծաւալում էր համազգային գործունէութիւն: 1909ի ջարդերի ժամանակ Քեսապի շրջանի Ներքին Պաղճաղազ գիւղի լատինաց վանքը փախուստի ճանապարհին ժամանակաւոր ապաստան դարձաւ Էքիզօլուք եւ Վերին Պաղճաղազ գիւղերի ողջ հայ բնակչութեան համար: Իսկ դրանից յետոյ լատին վարդապետները առաջնորդեցին փախստական հայերին Լաթաքիա: Իսկ ջարդերի հետեանքով Լաթաքիա տեղափոխուած հազարաւոր քեսապցիներ տեղաւորում են, ի թիւս այլ տեղերի, հայոց հոգեւտանը, լատինաց վանքում, ամերիկեան միսիոնարների կենտրոններում:

Եւս մէկ ուշագրաւ փաստ, որ վկայում է ոչ-այնքան միջդաւանական համագործակցութեան, որքան տարբեր դաւանանքների ներկայացուցիչ հայերի՝ միմեանց նկատմամբ տաժած կարեկցութեան եւ միմեանց ճակատագիրը կիսելու պատրաստակամութեան մասին: Այսպէս, հայերի մէջ

¹¹ Մէջբերումը՝ ըստ նոյն տեղում, էջ 107:

պառակտում առաջացնելու, ինչպես նաև երոպական պետություններին մոլորութեան մէջ գցելու նպատակով թուրքական իշխանութիւնները յետաձգում են հայ կաթողիկէների եւ անտարանականների գաղթը՝ կեղծ լուրեր տարածելով, թէ վերջիններս չեն տեղահանուելու¹²: Սակայն 1915 Յուլիսի 30ին, երբ սկսում է Գարատուրան գիւղի հայ առաքելական համայնքի գաղթը, անտարանական համայնքի մեծամասնութիւնը կազմող Սաղտճեան գերդաստանի ընտանիքները, չցանկանալով բաժանուել իրենց համագիւղացիներից, եւ ազգակիցների ճակատագիրը կիսելու պատրաստակամութեամբ, միանում են գաղթողներին:

Վերականգնողական աշխատանքներ

Աղէտից յետոյ իրականացուող վերականգնողական աշխատանքները միտումնաւոր էին տարագիրների վերադարձի կազմակերպմանը, անտարանական շինութիւնների վերակառուցմանը, կարիքաւորներին օգնութեան տրամադրմանը, մինչեւ կէտնաբերական իրականութեան մէջ մտնելը բնակչութեան առօրեայ կենսագործունէութեան կազմակերպմանը եւն.: Ահա այս խնդիրների շուրջ էլ իրականացում էր միջարանտանական համագործակցութիւնը Քեսապում:

1909ի կոտորածից յետոյ, երբ քեսապահայերը վերադարձան իրենց հարազատ բնակավայրերը, թուրքական խնդիրներն իրենց սրութեամբ ցցուեցին հայ հոգեւոր եւ աշխարհիկ կառույցների ու առաջնորդների առջեւ:

Կոտորածի հետեանքով, ինչպէս նշում է Չոլաքեանը, մինչ այդ ոչ այնքան ծանօթ շրջանը մեծ հետաքրքրութիւն սկսեց իրենից ներկայացնել: Ամէն տեղից թէ՛ հայկական եւ թէ՛ օտարերկրեայ բարեգործական կազմակերպութիւններ շտապեցին օգնութիւն տրամադրել աղէտեալներին: Նպաստ է հասնում անգամ Կ. Պոլսի հայոց պատրիարքութիւնից, ՀԲԸՄ Գահիրէի կենտրոնական վարչութիւնից:

Ամբողջ տարածաշրջանում (Կիլիկիա եւ Անտիոք) ստեղծում են նպաստից ստացման եւ բաշխման յանձնաժողովներ, որոնց ղեկավարութիւնը ստանձնում է Բերիոյ թեմի առաջնորդական տեղապահ Շահէ Ծ. վրդ. Գասպարեանը: Քեսապում նոյնպէս ստեղծում է այդպիսի յանձնաժողով, որի աշխատանքներին ներգրաւում են հայկական տարբեր եկեղեցիների ներկայացուցիչները: Այսպէս, յանձնաժողովի անդամներ էին տէր Մովսէս

¹² Իդէպ, թուրք պատմաբանների կողմից շրջանառութեան մէջ դրուած այն կեղծ թեզը թէ՛ կաթողիկէ եւ անտարանական հայերը չեն ենթարկուվել ջարդերի իրենց դաւանանքային պատկանելութեան շնորհիւ, եւ որին որոշակի տուրք են տալիս նաեւ հայկական շրջանակներ, հիմնում է սոյն հանգամանքի վրայ (Ա. Սիմաւորեան, «Թուրքիայի հայ կաթողիկէ համայնքը»՝ Ա. Սիմաւորեան, Վ. Հովեան, Հայ կաթողիկէ եւ անտարանական համայնքները Թուրքիայում. Ժամանակակից միտումներ, «Նորաւանք» ԳԿՀ, Երեւան, 2012, էջ 19-22, 28):

Ծ. վրդ. Ոսկերիչեանը, Աթիկեան քահանան, հայր Սափաթինօն, վերապատուելի Գունտաքճեանը, միսիոնարուի օրիորդ Չէյմալըսը եւ ուրիշներ:

Յանձնաժողովի գործունէութեան արդիւնքում հիմնում են որբանոց եւ այրիանոց: Հայր Սափաթինօն իր խնամակալութեան տակ է վերցնում 200 որբերի, քանի որ կոտորածների հետեանքով յատկապէս 6-7 տարեկան որբ երեխաների թիւը բաականին մեծ էր: Այրիացած կանանց աշխատանքով ապահովելու համար հիմնում է հիառածեղէնի փոքրիկ գործարան:

Վերականգնողական շրջանում պակաս կարեւոր չէր նաեւ հոգեբանական աջակցութիւնը աղէտեալներին: Այս տեսակէտից կարեւոր նշանակութիւն ունէին յատկապէս բարձրաստիճան հոգեւոր գործիչների այցելութիւնները աղէտեալ բնակավայրեր եւ ոգեւորիչ ելոյթները: Յատկանշական է այն, որ 1909ի ամռանը՝ ջարդերից յետոյ, մեծի տանն Կիլիկիոյ կաթողիկոս Սահակ Խապայեանը եռօրեայ այցելութիւն է իրականացնում Քեսապ, քարոզում տեղի հայ առաքելական եւ անտարանական եկեղեցիներում, իրականացնում ազգային վարժարանի նոր շէնքի հիմնարկէքի արարողութիւնը, այնուհետեւ, մեկնելով Լաթաքիա, հայ ժողովրդի անունից երախտագիտութիւն է յայտնում տեղի իշխանութիւններին ու բարեգործական կազմակերպութիւններին այնտեղ ապաստանած հայերին ցուցաբերում աջակցութեան համար:

Ինչ վերաբերում է 1915ի տեղահանութիւնից յետոյ վերականգնողական աշխատանքներին, ապա պէտք է նշել, որ 1918 Հոկտեմբերի 30ին Մուարոսի զինադադարի կնքումից եւ առաջին աշխարհամարտում Թուրքիայի պարտութիւնից յետոյ տարագրում քեսապահայերը սկսեցին աստիճանաբար վերադառնալ եւ վերահաստատուել իրենց նախկին բնակավայրերում: Սակայն վերադարձից յետոյ էլ ամէն ինչ հարթ ու հանգիստ չէր: Նախ առաջացել էին անվտանգութեան հետ կապում խնդիրներ՝ երկու պատճառով.

1. 1920ին կազմացրուեց հայկական լեգէոնը¹³, որը Մերձաւոր Արեւելքի հայ բնակչութեան անվտանգութեան երաշխաւորն էր:

2. Քեմալական շարժումից ոգեւորում տեղաբնակ թուրքերը սկսել էին ոտնձգութիւններ կատարել քրիստոնեաների, այդ թում նաեւ՝ հայերի նկատմամբ:

Այս մարտահրաւերներին դիմակայելու նպատակով Քեսապում նախկին լեգէոնականներից եւ նոր կամաւորներից ստեղծում է զինուորական իշխանութիւն, որը կարողանում է իրականացնել շրջանի պաշտպանութիւնը թուրքերի յարձակումներից: Այդ ինքնապաշտպանական կոիւններին

¹³ «Արեւելեան լեգէոն», *Հայկական սովետական հանրագիտարան*, հ. 2, Յ. Մեղապարտի անուն պոլիգրաֆկոմբինատ, Երեւան, 1976, էջ 33:

մասնակցում էին Քեսապի բոլոր յարանուանութիւնները: Օրինակ, ինչպէս վկայում է Չոլաքեանը¹⁴, Վերին եւ Ներքին Պաղճաղազ եւ Չաթալլէք գիւղերի ինքնապաշտպանական կոիւններին մասնակցում էին լատինաց վանքի¹⁵ ուսուցիչ Ծերուն Պետրոսեանը եւ խոհարար Պօղոս Պեօճիքեանը:

Իսկ առօրեայ կեանքը կազմակերպելու նպատակով զինուորական իշխանութեան կողմից Հայ առաքելական, կաթողիկէ եւ աւետարանական եկեղեցիների ներկայացուցիչներից կազմում է Ազգային միութիւն (ԱՄ), որը ստանձնում է հայաբնակ շրջանի կենսապահովման գործը: Վերջինիս խնդիրներն էին կազմակերպել Քեսապի հոգեւոր եւ կրթական կեանքը, զբաղուել նորաստեղծ եւ նոր վերադարձող ընտանիքների տեղաւորման հարցերով, որբերի եւ այրիների խնամքով, անտէր մնացած կալուածքների օգտագործման, ժառանգութեան եւ այլ հարցերով:

ԱՄն այդ ժամանակ, արդարեւ, հանդիսանում էր Քեսապի քաղաքացիական իշխանութիւնը: Նրա կողմից Քեսապի ներքին կեանքում կարգուկանոն հաստատելու նպատակով անգամ ստեղծում են ոստիկանութիւն եւ դատարան՝ անկարգութիւններն ու յանցագործութիւնները կանխելու, յանցագործներին պատժելու, վեճերը հարթելու համար: ԱՄն կարողանում է հմուտ կերպով իրականացնել նաեւ հայկական եւ ոչ-հայկական բարեսիրական կառոյցների տրամադրած օգնութեան ստացումն ու բաշխումը:

Կրթական գործը գլուխ բերելու խնդրով ԱՄն հիմնում է հայ առաքելական եւ աւետարանական համայնքների միացեալ վարժարանների ցանց: Երկու միացեալ վարժարաններ (մէկը՝ աղջիկների եւ միւրը՝ տղաների համար) հիմնում են Քեսապում 1920ին: Իսկ Քեսապի յարակից գիւղերում մինչեւ 1923 հիմնում են երկսեռ միացեալ նախակրթարաններ: Որպէս ենթակառուցուածքներ օգտագործում են աւետարանական եւ ազգային նախկին վարժարանների շէնքերը: Միացեալ վարժարաններին մեծ օգնութիւն են ցուցաբերում վերակազմաւորուած Ուսումնասիրաց ընկերութիւնը եւ ՀԲԸՄն:

Ընկերային խնդիրների լուծման առումով ԱՄն ստացուած դրամական օգնութեան մի մասն էլ օգտագործում է սերմացուի ձեռքբերման (ժողովրդին բաժանելու նպատակով) համար: Հիմնում է նաեւ որբանոց, ուր ապաստանում են նաեւ ոչ-քեսապցի որբեր:

Քեսապի պաշտպանութիւնն ապահովելու նպատակով գումարներ են յատկացում նաեւ զէնքի ու զինամթերքի հայթայթման համար:

Հարկ է նշել, որ ընդհանուր առմամբ Քեսապում ծաւալուող վերականգնողական աշխատանքների վրայ իր բարերար ազդեցութիւնն ունեցաւ Կիլիկիայում ազգային կեանքի վերազարթոնքը 1919-21՝ ֆրանսական ռազմակալման շրջանում:

¹⁴ Չոլաքեան, էջ 118:

¹⁵ Վանքը գտնւում էր Վերին Պաղճաղազ եւ Չաթալլէք գիւղերի միջեւ:

Վերջում հարկ է աւելացնել, որ ներկայում էլ Մերձատր Արեւելքում ծաւալում են փոթորկալոյզ գործընթացներ, որոնք ունեն ցեղասպանական բնութագիր¹⁶: Արդ, ինչպէս նախորդ դարասկզբի Յեղասպանութեան տարիներին, այժմ էլ հայութեան փրկութեան նպատակով հրատապ խնդիր է հայկական եկեղեցիների միջեւ համագործակցութիւնը, ինչի համար կարեւոր նշանակութիւն ունի անցեալի փորձի արժեւորումը:

INTERCONFESSIONAL COOPERATION IN KESAB DURING THE YEARS OF THE ARMENIAN GENOCIDE

(Summary)

VAHRAM HOVYAN
vhovyan@yandex.ru

In spite of some confessional differences, the consciousness of belonging to the same nation and religion – the Armenian nation and Christianity – Christianity has always predominated among Apostolic, Catholic and Evangelical Armenians. This fact has been a serious reason for close cooperation between Armenian Apostolic, Catholic and Evangelical churches in various spheres, due to the commonality of problems as well.

The article aims to show through the example of the small district of Kesab the interconfessional cooperation in the Armenian reality during the most complicated period of the Armenian Genocide. The historical facts of the time include the massacres in Cilicia in 1909, World War I (1914-1918) and the following years. The author outlines the cooperation between the Armenian Apostolic, Catholic and Evangelical churches of the time in three areas: a) prevention of disaster, b) struggle to minimize the harm during disaster and c) recovery efforts.

¹⁶ Տե՛ս, օրինակ՝ Էմմա Բեգիջանեան, «Թուրքական մասներն եւ սիրիական խնդրում», Հայաստանի Հանրապետութիւն, 20.01.2023:

